

QUÆSTIO MEDICA,  
QUODLIBETARIIS DISPUTATIONIBUS  
MANE DISCUTIENDA  
IN SCHOLIS MEDICORUM.

Die Jovis vigesima-tertiâ Decembris 1706.

M. JOANNE BAPTISTA ENGUEHARD,  
DOCTORE MEDICO,

PRÆSIDE.

*An Medicina sit adjectio deficientium, detractio redundantium?*

I.

**M**EDICINA spirans est imitatio naturæ: in hanc acriter defixa sensûs admoveat rationis, quæ faciem, quâ propius intuetur archetypum ac effingit; ab eo decedere vel minimum medicinæ nefas, & instar picturæ molî, coloribus, lineamentis, characteribus unis immorari. Intimam exquirat corporis substantiam, compagem, temperamentum, texturam investigat partium, discrimina, cohesionem, situm, communionem, canales, quæis fulcantur, usus & officia, quibus defunguntur. Accuratè notat infinitam ductuum ex truncis disparibus in furculos innumera- biles fruticantium seriem obvii passim diverticulis huc illuc oberantem; ram concinnos quoque tot organorum utilitatis, sic ordinis gradibus discretorum apparatus: ex iis omnibus invicem implexis, aut inter se communicantibus miræ liquorum utilium deductiones intrò, miræ superfluum vacationes foràs consequuntur. Solidis partibus sic affabre textum, liquidis jugiter irrigatum, & hæc illac perfluens intrâ modum stare ac vigere corpus (monstrante sensu) didicit divinus senex; artem ideo naturæ studiosam ac æmulam adjectione deficientium, redundantium detractio- ne contineri jure pronuntiavit.

**U**T sensus primam sufficit naturæ imaginem menti, sic continuâ observatione mens vivam exprimit ejus tabellam ac in se recondit. In hanc intenta novit veros naturæ motus, inclinationes, auctus, decrementa, mutationes ratione temperamenti, sexûs, victûs, ætatis, cæli solive, anni tempestatum, varii vitæ desidis, aut actuosæ generis, & istius modi adjunctorum queis afficitur in dies, & fugiendis petenda discernit. Isthæc singula maturo & acri perpendens examine ratio non dedignatur consortium observationis & imperium, illius se legibus astringit lubens, nihil appingit naturæ dissonum, nec ultra citrà que vagatur nubes, & inania captans. Hæc fuit norma divini senis, qui vagientem in cunis, & voces reddere nesciam adhuc medicinam aluit, eduxit, & certo incedentem pede firmavit. Omnem sub tanto cultore vigorem ferè consequuta, quot verba, tot protulit oracula in hominum salutem, cujus, quàm potis est, servandæ sibi conscia floreret in præsens, ni transuolans vestigia ducis ante se posita lubricis & fallentibus insisteret. Nunc quis medicinæ status? an vultus idem, eadem forma sibi & naturæ per omnia consentiens? hæc sublimes ructatur Matheseos leges, quarum ad numeros & libellam expendit naturam, & eam, dum fertur in ruinam præceps, calculis & librationibus incassum meritur: illa patrios fastidit cancellos fundi vicini amore capta, patentes in immensum percurrit physicæ campos, nunc Epicuri, Aristotelis, nunc Cartesii, Paracelsi jurans in verba, versicolor hæc & illa plerùmque confundens, operum sterilis, & effæta, morosa semper, & altercationum ferax. Diogenes meridianâ luce vel accensâ face non internosceret nobilem hanc matronam sic ludicram, sic personatam, rideret Democritus, Heraclitus infortunatam, aut ademptam lugeret. Fucum exuet formam resumptura, si naturam operantem solis ac irretitoris observationis & comitis individuæ rationis oculis assiduissimè contempletur.

**N**ATURAM hominis immortalem partim, partim & mortalem ex igne & aquâ, facultate dissidentibus, usu consentientibus constitutam Hippocrates affirmavit. Utriusque felici in semine connubio vita primulùm occipit: ignis confusas humoris moleculas evolvit, suis aptat locis, & alias ex aliis pendentes & concatenatas distendit rore novo, paulatim adauget & ad debitam magnitudinem perducit. In ortu, progressu, statu, vis ejus negotiosa sem-

per, sive formet ex humore corpus, sive cudad humorem in corporis officinis, incuneet alibilem cogatque in partium intervallis, supervacuum extrudat ex incerniculis, seu partes ipsas, dum intimè subit & perpendiculo dimotas ad agendum impellat. Alterum alterius poscit opem principium ad vitæ tutelam; utrumvis seorsum satis non est, alioquin motus deesset, aut alimentum. Ambo sufficiunt tùm aliis omnibus, tùm sibi mutuò: ignis omnia per omnia movet, aqua omnia in omnibus nutrit. Utriusque conjugio debet adesse modus, non æquilibrium, æquilibrium feriantur: modò superant, & superantur: igne superante minuitur humor ac deficit, superato redundat ac superfluit; sic gratâ ignis superantis, & superati vice adjectionis deficientium detractioni redundantium, & adjectioni deficientium detractioni redundantium succedit.

## I V.

**I**GNIS & aqua mutuâ virium temperatione coeunt in unum & ἔμφυτον τὸ θερμὸν componunt. Calidum innatum sive sit insitum partibus in primâ origine, sive iisdem allabatur à conformatione, numquam feriat ab opere, & sui proinde facit jacturam. Radiat assiduâ motione particularum, & eundo vires acquirit; pari deterritur earum fluxione, & in momenta dissipatur. Sic quem profert gradum ad vitam, eundem ad interitum festinat, ni similibus appositis damna refarciret: ruenti consulit fulturæ cibo potuque, ex his elicit humorem confusaneum, alibilem apponit sibi, rejectaneum seponit. Pabuli scilicet accessione vegetius factum interiorem intendit motum, consociat quidquid adest mole, textu, figurâ, pondere, motu que simile, exigit dissociabile, & velut intestini motûs obicem circulari trudit ad vias vacuationi convenientes, & tanquam redundans forâs excludit. Bijugum incitat hunc motum aër: circumfusus urget pressu ac elatere diverberat calidum innatum: inspiratus ipsum permeat, cum eo circumagitur, & ex stagnaturo diffluens reddit aëliquidum: circuitione vietus & iners expiratur, inspirationis reciprocatione renovandus. Hominis perpende naturam, quâ crescit, viget, senescit, totam comperies necessariis apponendis, inutilibus detrahendis jugiter incumbentem; statim ac illis deficitur, vel his obruitur, omni privatur motu, & vitam cum morte commutat.

## V.

**Q**UÆ N A N igitur opera medicinæ, quæ cura, quis scopus? Corporis humani nata subsidio conniti debet, ut plenum exonerando levet, inane recreet instaurando, sanum æstimet ex æquo calidi innati motu, & cum eo commetiatur. Functionum in-

regritas iustæ sit utriusque ad seinvicem proportionis mensura. Hanc excedit habitus corpulentior, ad opus pigrior, vasis tumentior, statim idèd vacatione solvendus: deficit ab eâ macilentior in dies, languidior in pensio, vasis flaccidior, propterea pabulatione reficiendus. Huic primæ si pareat legi & velut acui nauticæ se penitus addicat Medicus, ut rectum, sic obliquum internoscet certò, nec umquam de alterutro temerè pronuntiabit. Pensitatis deinde substantiâ, compage, temperamento corporis universi: textu, differentiis, cohesionem, situ, communione, usibus & officiis singularum partium diligenter examinatis dignoscet quæ sit totius, quæ partium cuiusque virtus, destinatio, consensus, & conspiratio: tum quibus servetur aut lædatur causis, si sexûs, victûs, ætatis, cæli solive, anni temporum, varii vitæ desidii aut actuosæ generis, & similium adjunctorum vires exploret, & ad connatam corporis & partium constitutionem sedulus expendat. Sua scilicet est corpori partibusque sanitas, sua ægritudo, non aliundè repetendæ, quàm unde manant, & foventur. Isthæc rerum sensibilem concursio, & frequens vicissitudo calidum innatum continuò diffuens reparat, auget, imminuit, absumit, diversimodè immutat, & efficit apponendo utili, & inutili seponendo par, aut impar.

*Ergò Medicina est adjectio deficientium, detractio redundantium.*

Domini Doctores disputaturi.

M. Ludovicus Guillot.

M. Philippus Fontaine.

M. Joannes Cordelle.

M. Joannes - Baptista Fer-  
melhuis.

M. Antonius Pepin.

M. Petrus Yon.

M. Joannes Despiney Pesebârd.

M. Petrus Azcivido, Schola-  
rum Professor.

M. Antonius de Saint-Yon,  
Medicus Regis ordinarius,  
Censor.

Proponebat Parisiis FRANCISCUS POUSSE.  
Cenomanus, Baccalaureus Medicus. A. R. S. H. 1706.